

Na osnovu čl. 198. stava (16) i 248. Zakona o bankama ("Službene novine Federacije BiH," broj: 27/17), člana 5. stava (1) tačka h) i člana 19. stava (1) tačka c) Zakona o Agenciji za bankarstvo Federacije Bosne i Hercegovine ("Službene novine Federacije BiH", broj: 75/17) i člana 12. stavak (1) tačka d) Statuta Agencije za bankarstvo Federacije Bosne i Hercegovine ("Službene novine Federacije BiH", broj: 03/18), Upravni odbor Agencije za bankarstvo Federacije Bosne i Hercegovine, na sjednici održanoj dana 29.03.2018. godine donosi

**ODLUKU
O PRODAJI DIONICA, IMOVINE, PRAVA I OBAVEZA
BANKE U RESTRUKTURIRANJU**

I. OPŠTE ODREDBE

Član 1.

Predmet odluke

Ovom odlukom propisuje se postupak prodaje poslovanja banke u restrukturiranju, odnosno način prodaje dionica, imovine, prava i obaveza banke u postupku restrukturiranja.

Član 2.

Subjekti odluke

Ova odluka primjenjuje se na:

- a) banke sa sjedištem u Federaciji Bosne i Hercegovine kojima je Agencija za bankarstvo Federacije Bosne i Hercegovine (u daljem tekstu: Agencija) izdala bankarsku dozvolu i
- b) bankarsku grupu koja je predmet kontrole Agencije na konsolidovanoj osnovi.

Član 3.

Pojmovi

(1) Pojedini pojmovi koji se upotrebljavaju u ovoj odluci imaju sljedeće značenje:

- a) „**banka u restrukturiranju**” znači banku na koju se primjenjuju mjere restrukturiranja mjera sanacije;
- b) „**vlasnički instrumenti**” znači dionice, drugi instrumenti koji daju pravo na vlasništvo, instrumenti koji se mogu konvertirati u dionice ili koji daju pravo stjecanja dionica ili drugih vlasničkih instrumenata te instrumenti koji predstavljaju vlasništvo dionica ili drugi vlasnički instrumenti;
- c) „**predmetna imovina**“ znači dionice, imovina, prava i obaveze banke u restrukturiranju na koju se primjenjuje instrument prodaje poslovanja;
- d) „**sistemska kriza**” znači poremećaj u finansijskom sistemu koji može uzrokovati ozbiljne negativne posljedice za unutarnje tržište i realnu privredu. Sve vrste finansijskih posrednika, tržišta i infrastrukture mogu potencijalno biti sistemski važni do određene mjere;
- e) „**likvidacija predmetne imovine**” znači realizacija imovine banke.

(2) Pojmovi koji nisu definisani u stavu (1) ovoga člana imaju značenja u skladu sa odredbama Zakonom o bankama (u daljem tekstu: Zakon)

Član 4.

Prodaja poslovanja

(1) Agencija, instrument prodaje poslovanja banke provodi, osim banci za posebne namjene, prodajom kupcu:

- a) imovine, prava ili obaveze banke u postupku restrukturiranja u cijelosti ili djelomično ili
- b) dionica ili drugih vlasničkih instrumenata izdanih od strane banke u postupku restrukturiranja.

- (2) Agencija prodaju iz stava (1) ovog člana vrši prodajom putem javnog oglašavanja i prodajom bez javnog oglašavanja.
- (3) Agencija donosi rješenje o prodaji određenog dijela ili sve imovine, prava ili obaveza banke u postupku restrukturiranja ili rješenje o prodaji dionica ili drugih vlasničkih instrumenata izdanih od strane banke u postupku restrukturiranja ako je rješenjem o postupku restrukturiranja određeno da se restrukturiranje provodi primjenom instrumenta prodaje poslovanja banke.

II. POSTUPAK PRODAJE PREDMETNE IMOVINE JAVNIM OGLAŠAVANJEM

Član 5.

Postupak prodaje

- (1) Agencija provodi postupak prodaje poslovanja banke u restrukturiranju u skladu s načelima iz člana 199. Zakona.
- (2) Postupak prodaje predmetne imovine iz stava (1) ovoga člana vrši se javnim oglašavanjem putem javne ponude ili neposredne pogodbe.

Član 6.

Oglašavanje

- (1) Agencija će u cilju poštivanja načela transparentnosti i ispravnog prikazivanja predmetne imovine banke u restrukturiranju, vodeći računa o očuvanju finansijske stabilnosti, u sredstvima javnog informisanja oglasiti prodaju.
- (2) Oglašavanje iz stava (1) ovoga člana Agencija objavljuje najmanje u jednom domaćem dnevnom listu koji je dostupan na cijelom području Federacije Bosne i Hercegovine i na službenoj web stranici Agencije.

Član 7.

Potencijalni kupci

- (1) Kupci u postupku javnog oglašavanja, poštujući načelo ravnopravnog položaja potencijalnih kupaca, mogu biti sva domaća i strana fizička i pravna lica koja zadovoljavaju uslove propisane čl. 198. i 199. Zakona i uvjete propisane ovom odlukom.
- (2) Lica iz stava (1) ovog člana stječu svojstvo učesnika u prodaji poslovanja podnošenjem ponude, odnosno registracijom.

Član 8.

Sukob interesa

- (1) Agencija kod prodaje predmetne imovine banke u restrukturiranju poštuje načelo izbjegavanja sukoba interesa.
- (2) Pod sukobom interesa u smislu stava (1) ovoga člana smatra se učešće na strani potencijalnog kupca uposlenika Agencije izravno ili putem punomoćnika te povezanih lica s bankom u restrukturiranju na način kako je to propisano Zakonom.
- (3) Ukoliko se utvrdi postojanje okolnosti iz stava (2) ovoga člana takva ponuda proglasit će se nevažećom i ukoliko su ispunjeni ostali uslovi postupak se nastavlja, a ukoliko nisu ispunjeni ostali uslovi postupak se proglašava neuspjelim.

Član 9.

Javno oglašavanje

- (1) Pod javnom ponudom, u smislu ove odluke podrazumijeva se prodaja predmetne imovine banke u restrukturiranju putem prikupljanja ponuda potencijalnih kupaca pri čemu su, pored početne cijene, unaprijed definisani i drugi kriteriji za vrednovanje ponuda.

- (2) Neposredna pogodba, u smislu ove odluke je prodaja predmetne imovine putem izravnih pregovora.

Član 10.

Faze postupka prodaje

- (1) Postupak prodaje putem oglašavanja obuhvata:
- a) pripremu javne ponude ili neposredne pogodbe;
 - b) prijavu za učešće i registraciju učesnika;
 - c) provođenje i završetak javne ponude ili neposredne pogodbe;
 - d) vrednovanje ponuda;
 - e) donošenje prijedloga odluke o izboru najpovoljnije ponude;
 - f) aktivnosti poslije provedenog postupka.
- (2) Agencija će postupak prodaje iz stava (1) ovog člana provesti poštujući načelo hitnosti postupka restrukturiranja.

Član 11.

Sadržaj javnog poziva

- (1) Javni poziv za sudjelovanje u prodaji predmetne imovine najmanje sadrži sljedeće:
- a) ime banke u restrukturiranju;
 - b) vrstu i cijenu predmetne imovine;
 - c) kriterije za izbor najpovoljnije ponude;
 - d) rok i mjesto podnošenja ponude;
 - e) iznos depozita i naknade za sudjelovanje u javnom pozivu;
 - f) vrijeme i mjesto objavljivanja vrednovanja podnesenih ponuda;
 - g) adresu i broj telefona gdje se mogu dobiti dodatne informacije.
- (2) Potencijalni kupci imaju pravo tražiti od Agencije dodatne informacije o predmetnoj imovini i o postupku.
- (3) Dodatne informacije iz stava (2) ovoga člana traže se u pismenoj formi i u pismenoj formi se dostavljaju potencijalnim kupcima.

Član 12.

Početna cijena

- (1) Početnu cijenu prodaje predmetne imovine banke u restrukturiranju utvrđuje Agencija, na osnovu procjene koja je izvršena u skladu s Odlukom o uslovima i načinu vršenja nezavisne procjene vrijednosti imovine i obaveza banke prije i u toku postupka restrukturiranja banke.
- (2) U slučaju kada su predmet prodaje dionice, plaćanje se vrši isključivo u novcu.

Član 13.

Podnošenje ponuda

- (1) Na osnovi javnog poziva potencijalni kupci podnose ponudu.
- (2) Ponuda iz stava (1) ovoga člana podnosi se u zapečaćenoj kuverti, na kojoj je naznačena šifra podnosioca ponude. Sve pristigle ponude Agencija je dužna čuvati u skladu s internim aktom Agencije o čuvanju i arhiviranju dokumenata Agencije.
- (3) Ako je podnositelj ponude pravno lice, uz ponudu iz stava (2) ovoga člana prilaže se odluka nadležnog organa.
- (4) Ponuda iz stava (1) ovoga člana podnosi se Agenciji izravno ili preporučenom poštom, u roku predviđenom pozivom.
- (5) Nakon podnošenja ponude, sve do roka predviđenog za vrednovanje i rangiranje ponuda, podnositelj ponude ima pravo podnijeti dopune ponude, na način utvrđen za podnošenje ponude.

- (6) Podnositelj ponude može odustati od sudjelovanja po javnom pozivu, o čemu je dužan pismeno obavijestiti Agenciju najkasnije dva dana prije roka utvrđenog za vrednovanje i rangiranje ponuda.

Član 14.

Vrednovanje ponuda

- (1) Procedura vrednovanja, rangiranja i objavljivanja ponuda provodi se i ako je podnesena najmanje jedna ponuda.
- (2) Agencija može od podnositelja ponude, u postupku vrednovanja ponuda, zatražiti dodatna objašnjenja i dodatne informacije koje se odnose na poslovni ugled, kreditnu sposobnost i drugo, što može utjecati na rangiranje ponude.
- (3) Vrednovanje i rangiranje ponuda vrši se u roku od sedam dana od dana zatvaranja javnog poziva za podnošenje ponuda.

Član 15.

Izbor najpovoljnije ponude

- (1) Poslije završenog vrednovanja sačinjava se zapisnik u kojemu se navode elementi i kriteriji vrednovanja i rangiranje (redoslijed vrednovanih ponuda).
- (2) Izbor najpovoljnije ponude vrši se u skladu sa objavljenim uslovima iz javnog poziva.
- (3) U slučaju da su dvije ponude jednako vrednovane prihvatit će se ranije pristigla ponuda.
- (4) Agencija donosi odluku kojom proglašava javnu ponudu neuspjelom ukoliko se niti jedna ponuda ne ocijeni prihvatljivom.
- (5) U slučaju iz stava (4) ovoga člana Agencija može ponoviti javni poziv ili izvršiti prodaju neposrednom pogodbom.

Član 16.

Povrat depozita

Podnositelji ponuda, nakon provedenog postupka imaju pravo na povrat uplaćenog depozita.

Član 17.

Zaključivanje ugovora

- (1) Nakon donošenja odluke o izboru najpovoljnije ponude, podnositelju ponude dostavlja se poziv za zaključenje ugovora s tekstom ugovora i naznačenim rokom njegovog zaključivanja.
- (2) Podnositelj odabrane ponude je obavezan zaključiti ugovor najkasnije u roku od pet dana od prijema poziva iz stava (1) ovoga člana.

Član 18.

Prava i obaveze podnositelja odabrane ponude

- (1) Podnositelj odabrane ponude dužan je uplatiti ugovorenu cijenu predmetne imovine u roku utvrđenom ugovorom.
- (2) U slučaju uplaćenog depozita cijena iz stava (1) ovoga člana umanjuje se za iznos uplaćenog depozita.

Član 19.

Neispunjenje obaveza iz ugovora

- (1) Ukoliko podnositelj odabrane ponude ne ispuni obavezu iz članka 18. ove odluke, smatrat će se da je odustao od kupovine predmetne imovine.
- (2) U slučaju iz stava (1) ovoga člana, podnositelj odabrane ponude nema pravo na povrat depozita.
- (3) U slučaju iz stava (1) ovoga člana Agencija poziva sljedećeg najboljeg rangiranog podnositelja ponude na zaključenje ugovora.

- (4) Ukoliko niti jedan pozvani podnositelj ponude ne prihvati poziv Agencije iz stava (3) ovog člana javni poziv smatrat će se neuspjelim.

Član 20.

Objavljivanje rezultata

Agencija će u roku od dva dana od dana završetka postupka javne ponude objaviti rezultate.

Član 21.

Žalba

Podnositelji ponuda imaju pravo na žalbu u skladu s članom 12. Zakona o Agenciji za bankarstvo Federacije Bosne i Hercegovine.

Član 22.

Neposredna pogodba

- (1) Agencija može obaviti prodaju predmetne imovine banke u restrukturiranju u skladu s članom 199. stav (4) Zakona neposrednom pogodbom s određenom kategorijom kupaca ili određenim kupcem čime se ne narušava načelo ravnopravnosti potencijalnih kupaca.
- (2) Neposredna pogodba, u smislu stava (1) ovoga člana je prodaja predmetne imovine banke u restrukturiranju putem izravnih pregovora.
- (3) Kupac sklapa ugovor u skladu s odredbama ove odluke.

Član 23.

Poziv za sudjelovanje u neposrednoj pogodbi

Poziv za neposrednu pogodbu sadrži najmanje sljedeće:

- a) ime banke u restrukturiranju;
- b) vrstu i cijenu predmetne imovine;
- c) kriterije neposredne pogodbe;
- d) vrijeme i mjesto održavanja neposredne pogodbe;
- e) adresu i broj telefona gdje se mogu dobiti dodatne informacije.

III. PRODAJA POSLOVANJA BEZ JAVNOG OGLAŠAVANJA

Član 24.

Preduslov za primjenu prodaje poslovanja bez javnog oglašavanja

- (1) Agencija može provesti postupak prodaje poslovanja bez javnog oglašavanja prodaje, ako utvrdi da bi takvo oglašavanje onemogućilo ili otežalo ispunjenje jednog ili više ciljeva restrukturiranja, a posebno ako su ispunjeni sljedeći uslovi:
 - a) ako smatra da postoji bitna prijetnja finansijskoj stabilnosti koja proizlazi iz moguće propasti banke u postupku restrukturiranja,
 - b) ako smatra da bi se javnim oglašavanjem prodaje štetilo učinkovitosti prodaje ili postizanju cilja restrukturiranja.
- (2) U slučaju iz stava (1) ovog člana Agencija može kontaktirati dioničare grupe, ukoliko je banka u restrukturiranju član grupe, potencijalne investitore koji su ranije iskazali interes za banku u restrukturiranju i po potrebi druge potencijalno zainteresirane kupce radi pokretanja postupka neposredne prodaje.
- (3) Nakon što potencijalni kupci iz stava (2) ovog člana pisanim putem iskažu interes za sudjelovanje u postupku neposredne prodaje, Agencija će ih obavijestiti o uslovima i načinu neposredne prodaje.

Član 25.

Okolnosti koje predstavljaju bitnu prijetnju finansijskoj stabilnosti

Prilikom procjene ispunjavanja uvjeta iz člana 24. ove odluke, najmanje se procjenjuje da li bi javnim oglašavanjem prodaje predmetne imovine došlo do narušavanja tržišta odnosno uticaj na finansijsko tržište, pri čemu se cijeni uticaj na rizik nastajanja sistemske krize, povjerenje u finansijsko tržište, blagovremena primjena instrumenata restrukturiranja, smanjenje iznosa ili povećanje cijena kratkoročnog ili srednjoročnog finansiranja koje je na raspolaganju bankama, obustava ključnih usluga ili značajno povećanje cijena pružanja tih usluga u bankama, povlačenje kratkoročnih sredstava ili depozita banaka, smanjenje cijena dionica banaka ili cijena imovine u vlasništvu banaka, posebno u slučaju kada mogu imati utjecaj na kapital banaka, povećanje cijena osiguranja od kreditnog rizika ili smanjenje rejtinga banaka ili drugih tržišnih učesnika koji su relevantni za banku.

IV. PRELAZNE I ZAVRŠNE ODREDBE

Član 26.

Stupanje na snagu

Ova odluka stupa na snagu osmog dana od dana objavljivanja u „Službenim novinama Federacije BiH“.

Broj: U.O.-18-06/18
Sarajevo, 29.03.2018. godine

PREDSJEDNICA
UPRAVNOG ODBORA

mr. sc. Ljerka Marić, dipl.ecc. s.r.